



Aningaasanut Nunanullu Allanut Naalakkersuisoq

Aningaasaqarnermut Ataatsimiititaliap Alluitsumi tulattarfiliornissamik sanaartorfissagissaanissamillu suliaq nr. 01.31.06/07-00262 pillugu ataasinngornermi ulloq 2. juli 2007-imi aalajangiinera pillugu Naalakkersuisunut ilisimatitsineq.

Aningaasaqarnermut Ataatsimiititaliap oqaaseqaatai

Aningaasaqarnermut Ataatsimiititaliami **amerlanerussuteqartut** Atassummeersut, Siumumeersut Inuit Ataqtigiinneersullu qinnuteqaat akuersissutigaa. Suliniut Kujataani takornariaqarnermik ineriartortitsinermit iluaqutaalersinnaasoq amerlanerussuteqartut isumaqarput. Taamatuttaaq Kujataani illuutunik oqaluttuarisaanermut pingaaruteqartunik allanngutsaaliuinermit suliniut peqataaqataassasoq amerlanerussuteqartut isumaqarput. Aammalu kulturi eqqarsaatigalugu illuutit oqaluttuarisaanermut pingaarutillit allanngutsaaliorneqarnissaannik qulakkeerisunik iliuuseqarnissaq pingaaruteqartoq amerlanerussuteqartut isumaqarput. Suliniummut aningaasaliinissaq aningaasaliisartunit avataaneersunit kissaatigineqarpoq, tamatumanili piumasqaataalluni Namminersornerullutik Oqartussat talittarfimmuut taamatullu suliniummi pisariaqartinneqartumik Alluitsumi sanaartorfissagissaanissamut aningaasaliinissaat. Taamaattumillu suliniutip piviusunngortinneqarnissaanut Namminersornerullutik Oqartussat tapeeqataanissaat amerlanerussuteqartunit taperserineqarpoq.

Suliniummik pineqartumik pilersitsineq piginnittuulerumaartut namminnek akilertariaqaraat **ikinnerussuteqartoq** Demokraatit ilaasortaataat isumaqarpoq. Aammattaaq suliniut Aningaasaqarnermut Ataatsimiititaliamit siusinnerusukku marloriarluni itigartinneqarsimasoq maluginiartariaqartoq ikinnerussuteqartoq isumaqarpoq. Ikinnerussuteqartup tungaanit isigalugu taamanerit allanngortoqarsimangilaq, taamaattumillu Aningaasaqarnermut Ataatsimiititaliap tamarmiusup siusinnerusukku tunngavilersuutai tunngavilersuutigalugit itigartitsinissaq ikinnerussuteqartup aalajangiimusimavaa.

Aningaasaqarnermut Ataatsimiititaliap aalajangiinera

Naalakkersuisut inassuteqaataat Aningaasaqarnermut Ataatsimiititaliami amerlanerussuteqartunit **akuersissutigineqarput.**

Inussiarnersumik inuulluaqqusillunga

Augusta Salling
Aningaasaqarnermut Ataatsimiititaliap siulittaasua